

Ebbaluṅa endaayi eya Peetero Enyanjula

Owanḡandiiha ebbaluṅa ya *Peetero* endaayi gaali nje Peetero omuhwenda wa Yesu. Peetero gatandiha ebbaluṅa yino n’aloma ehi gaali n’eyi gaali n’añandiihira. Ebbaluṅa yino, gayiṅandiihira abafugiirira Kurisito bosibosi aba galanga ati “balugendwa” mu hyalo muno (1:1, 1:17; 2:11). Engeri ebbaluṅa yino, yifaananaho n’ebbaluṅa eyi Pawulo gaṅandiihira Abefeeso, bangi baṅeega baati Peetero gayiṅandiiha mu mwaha ogw’enkaaga n’etaanu oluvanyuma lw’ohusaaliwa hwa Kurisito. Peetero gaṅandiiha ebbaluṅa yino n’ali e Rooma, eyi galanga mu ndoma ey’ohubbumbirya ati Bbebbulooni (5:13).

Peetero gaṅandiiha ebbaluṅa yino ohubagobosamo amaani n’abaloma ati “...mu hubonaabona Hatonda abañeramo ekabi, olw’ehyo mutanjwamo maani.” (5:12). Naliṅo ohufaanana ṅagati wa 1 Peetero 2:11–3:7 n’Abefeeso 5:18–6:9 n’Abakolosaayi 3:18–4:6. Enyiriri ejo josijosi, jisomesa hu mago n’ohugondera abañugi. Era Peetero ahubbirisa abafugiirira Kurisito ohugumira ohubonaabona olwohuba ekomerero yiri huupi (4:1).

Ebiri mu bbaluṅa yino mu huupi

1. Peetero geyanjula (1:1-2).
2. Ohweyaasa Hatonda olw’obunonḡosi (1:3–2:10).

3. Engeri ey'ohumenyamo (2:11–4:11).
4. Ohugumira ohubonaabona (4:12–5:11).
5. Engohoba (5:12-14).

Obuheese

¹ Ese Peetero omuhwenda wa Yesu Kurisito mbanandiihira enywe abaatu ba Hatonda, aba gatobola, abalugendwa mu hyalo hino era abasasaana mu byalo by'e Pooto, e Galatiya, e Kapadokiya, Asiya n'e Bbisiniya. ² Ohuŋwa ahale n'ahale Hatonda Seefe mu humanya huhwe gabatobola ohuba babe, n'abita mu Mwoyo Omutukuvu olu mwagondera Yesu Kurisito gabagwalaasa olw'amafugi gage. Hatonda geyongere ohubaŋa ehisasabirisi n'emiyaaya.

Esuubi ly'obulamu obutaŋwaŋo

³ Abaatu beyaase Hatonda era Semwana ya Musengwa weefe Yesu Kurisito. Olw'ehyere hihye ehangi, gaatunoŋola n'abita mu hulamuha hwa Yesu Kurisito. Hino hituletera ohusuubira obulamu obutaŋwaŋo. ⁴ Era mulisuna omugabo ogwo ogutacuuhacuuha era ogutaŋwaŋo emirembe n'emirembe ugu Hatonda gaababihira mwigulu. ⁵ Olw'ohufugiirira hwenywe, Hatonda abahuuma n'obuŋangi wuwe ohwola olu alinunula ebiitu byosibyosi hu ludaalo olw'ekomero. ⁶ Olw'ehyo musaŋalyenga bugali weene wayire muli hugada olw'ebigosi ebingi ebi muli ni nabyo eby'ehiseera obuseera.

⁷ Ebigosi ebyo biboolaho ohulaga ti ohufugiirira hwenywe hw'amazima. Ng'olu basanusa ezaabbu olw'ohwenda ohutusamo obucaafu, mwesi ohufugiirira hwenywe ohuhiraho ezaabbu omunendo huli n'ohugezesewa ko hunangale. Ebyo ni biḡooye ko musune eḡono era babapahe hu ludaalo olw'ekomero olu Yesu aligoboleraho. ⁸ Wayire simumubonangaho, mumwenda era wayire simumubonaho esaawa yino muli n'esangaalo bitiriifu bugali eritalomeha olwohuba mumufugiirira. ⁹ Ehyo hibaletera ohunḡoha era nj'ehigendererwa hy'ohufugiirira hwenywe.

¹⁰ Abanaabbi babalomera ebiḡamba hu hisasabirisi hya Hatonda ehi gaali n'aja hubanambira ohubanḡola era bendulirisa bugali n'obwegenderesa. ¹¹ Ni bagesyaho ohutegeera embeera n'ebiseera ebi Omwoyo wa Kurisito gaali n'abalengesa olu galoma hu hubonaabona hwa Kurisito n'eḡono eribalimuḡa. ¹² Hatonda galeetera abanaabbi abo ohutegeera baati ebi baali ni balomaho sibyali ni bija hubaḡo mu mulembe gwawe aye mu gwenywe. Naahani abo abababuulira Amanḡuliro Amalaḡi, babuulira mu maani g'Omwoyo Omutukuvu. N'abamalayika boosi begomba ohumanya ebiḡamba hu bunḡosi buno.

Hatonda genda hube bagwalaafu

¹³ Olw'ehyo mwetegehe, mumanye ehiranḡi ehuhuhola era muḡuge emitwe jenywe, n'esuubi lyenywe lyosiryosi libe hu hisasabirisi

ehi Yesu Kurisito alibanambira n'agobooye. ¹⁴ Ng'abaana abagondi, mutagenderanga mu hwegomba ohubi ohu mwalinga ni nahwo ni muhiiri humanya hituufu. ¹⁵ Aye ng'olu Hatonda ow'abalanga anjuma hibi, mwesi mubenga bagwalaafu mu hiisi hiitu ehi muhola. ¹⁶ Olwohuba hyanandiihiwa hiiti, "Mube bagwalaafu ng'olu ese ndi mwawufu."*

¹⁷ Ng'olu muli ni Hatonda oyu mulanga muuti Bbaabba, oyo asalira hiisi muutu omusango n'atehubbira, njahani mumenye hu hyalo huno hy'abalugendwa ni mumutya era ni manyire muuti sinje wenywe. ¹⁸ Olwohuba manyire bulaji weene muuti endiji eyi basasula siyabiitu ebinwanjo hy'efeeza oba ezaabbu aye gabanunula mu bulombolombo wabasehulu benywe. ¹⁹ Gabanunula olw'amafugi ga Kurisito ali mu hifo hy'etaama eyibulaho mbalo oba buleme wosiwosi. Era amafugi ago gabbeeyi. ²⁰ Hatonda ko atonde ehyalo gaatobola Kurisito ohuba enongo hu lwenywe aye ohumuhwehula hibaayeno mu ndaalo jino ej'ekomerero. ²¹ Ohubita mu Kurisito, mwafugiirira Hatonda owamulamusa ng'ahena amuja obubbala era ohufugiirira n'esubi lyenywe biri mu Hatonda oyo.

²² Ng'olu mwanjulira ehibono hya Hatonda ehy'amazima mwagonda mwafugiirira, Hatonda gabagwalaasa era mwasuna ohwenda ohw'amazima. Olw'ehyo mwendanenga n'omwoyo mulala. ²³ Olwohuba ni mwanonjoha

* **1:16** 1:16 Leev 11:44-45; 19:2

mwafuuha baana ba Hatonda atafa era
 mwasuna obulamu obutanwano ohubita mu
 hibono hihye. ²⁴ Hyanandiihiwa hiiti,
 “Abaatu bali hy’anyaasi,
 era n’obunoono waawe
 buli hy’ehimuli ehinotoha ehiseera buseera.
 Enyaasi linotoha,
 era n’ehimuli hyosi hinotoha nga higwa nyaasi.*
²⁵ Aye ehibono hya Musengwa
 hiribanjo emirembe n’emirembe.”
 Era ehyo nj’ehibono ehi bababuulira mwafugi-
 irira.

2

Yesu nj’ebaale ery’ebbeeyi

¹ Olw’ehyo mwefihuleho ebibi byosibyosi,
 ohuhotogerera abaatu, obudulingi, obunafu-
 usi, ekirihindi n’ohuloma ebibi hu bahyenywe.
² Ng’olu baana abanere benda amabeere am-
 atomwa ko bahule bulaji, mwesi munembenga
 hu hibono hya Hatonda mwahanangala mu
 bunonosi wenywe. ³ Hyanandiihiwa hiiti,
 “Mwalega hu Musengwa weefe era mumanyire
 ng’olu ali mulaji.”*

⁴ Mutiine eyiri Yesu Musengwa, ebaale
 ery’ebbeeyi eri baatu baagaana baati
 siryamugaso aye Hatonda galitobola lyaba
 ly’ebbeeyi eyi ali. ⁵ Mwesi muli mabaale
 ag’ebbeeyi aga Hatonda ali hutambisa
 ohutongola enyumba* yiye. Mwesi muli basengi

* **1:24** 1:24 Yis 40:6-8 * **2:3** 2:3 Zab 34:8 * **2:5** 2:5
 Byanandiihiwa ebindi biroma biiti “Yekaalu ey’omwoyo.”

ba Hatonda abamuṅa enongo eyi musangaasa ohubita mu Yesu Kurisito. ⁶ Hyaṅandiihiwa hiiti, “Bona taaye ebaale mu Sayuuni, erinatobola era ery’ebbeeyi, era hiisi amwesiga saanahaswale.”*

⁷ Ebaale lino lyamugaso bugali eyiri enywe abamufugiirira aye eyiri abo abatafugiirira, “ebaale eri abatongoli batala baati siranji, nj’eryafuuha ery’omugaso mu gosigosi.”*

⁸ Era nindi hyaṅandiihiwa hiiti, “Lino nj’ebaale egumu erireetera abaatu ohwegumula, ebaale ehosa eribaleetera ohwetega baagwa.”

Begumula olwohuba sibafugiirira ehibono, nga Hatonda ehigategeha hyolerera.*

Abaatu abagwalaafu

⁹ Aye enywe babatobola, muli basengi ba Hatonda, egwanga eryawufu, abaatu babe abagatobola ohulomera abaatu obuhwenda bw’oyo owabalanga ohuṅwa mu hiirema† ohwingira mu njase yiye ey’amaani.* ¹⁰ Simwali baatu ba Hatonda aye ṅaahani muli baatu babe era egongo eyo mwali muṅuma hisa hihye aye ṅaahani mwahisuna.*

Abeedu ba Hatonda

* **2:6** 2:6 Yis 28:16 * **2:7** 2:7 Zab 118:22 * **2:8** 2:8 Yis 8:14-15
 † **2:9** 2:9 Oba ebibi. * **2:9** 2:9 Huṅ 19:5-6; Yis 43:20-21; Mag 4:20; 7:6; 14:2 * **2:10** 2:10 Kos 2:23

¹¹ Bameeri bange, ng'olu mumanyire muuti muli balugendwa era abawuli mu hyalo muno, mbasunga mwenalame ohuhola ebikolwa eby'omubiri ebibanjirirania. ¹² Esambo jenywe jibenga ndani ngati mu batafugiirira Hatonda abamumenyiremo. Wayire banababenjerenga, ne ni banabonenga ebikolwa byenywe ebirani, baja huja Hatonda enono‡ hu ludaalo olw'ekomero.

¹³ Ng'olu muli baloobera ba Yesu Musengwa, mugonderenga abanugi benywe: mujulirenga habaha wenywe, ¹⁴ oba abanugi abandi abagatano ohugudya abo abahola ebibi era n'ohusiima abo abahola ebirani. ¹⁵ Hatonda genda ebikolwa byenywe ebirani bisimye ebibono by'abanubeebe abo ababanaha esiro. ¹⁶ Wayire muli badembe aye muli beedu ba Hatonda era simutambisanga dembe linye ohuhola ebibi. ¹⁷ Mujenga hiisi muutu enono, mwendanenga hy'abalebe, mutyenga Hatonda era mujenga habaha enono.

Kurisito nj'ehyohuboneraho hyefe

¹⁸ Abeedu, mujulirenga abasengwa benywe, si abo abababisa obulani bonene aye ni naabo abababisa obubi. ¹⁹ Hiri hiityo olwohuba Hatonda alibana ekabi olw'ohwehaliriraha ebigudyo ebi baatu babahola ananuma songa. ²⁰ Omuutu asunamo hi singa bamuhubba olw'ebibi ebi ahola? Aye singa bamugudya

‡ **2:12** 2:12 Oba hu ludaalo olu Hatonda anahatuhyalire.

olw'ebirani ebi ahola, ehyo hisangaasa Hatonda. ²¹ Hatonda gabalanga ohuhola ebirani wayire hibanweryemo ohugada. Ni Kurisito yeesi gagada hu lwenywe. Muholenga ebi gaholanga olwohuba Ye nj'ehyohuboneraho hyenywe. ²² Enjuma hibi ehi Kurisito gaahola wayire ohuloma ehy'obundulingi.* ²³ Era ni bamufodogola, niye sigabagobolamo era ni bamugudya sigesasusa muutu yesiyesi aye niye obulamu wuwe gabunambya Hatonda asala emisango n'atehubbira.* ²⁴ Kurisito omwene geetwiha ebibi byefe gabinjira hu musalabba, ko hube hy'abaatu abafuuye eyiri ehibi aye abagwalaafu mu moni jije. Ebihubbe ebi bamwosaho mbebibanonia. ²⁵ Mwali munabire hy'etaama aye babagobosa eyiri Omwayi era Omuhuumi w'obulamu wenywe.*

3

Abahasi n'abasinde abafumbo

¹ Abahasi munulirenga abawamwenywe, ko abandi hu bo abatafugiirira Hatonda basobole ohufugiirira olw'esambo jenywe. ² Hino hinahabejo olw'ohubona enono eri mubana n'esambo jenywe endani. ³ Era obuono wenywe butabanga wa hu mugulu, hy'emisono jefiiri oba ohwambala emihomyo ej'ezaabbu oba engoye ej'ebbeeyi. ⁴ Aye bubenga wamugati mula n'emyooyo emibombeefu era abaatu abatanyiganyiga, ehyo nj'ehihira obulani mu

* **2:22** 2:22 Yis 53:9

* **2:23** 2:23 Yis 53:7

* **2:25** 2:25 Yis

moni ja Hatonda. ⁵ Era n'abahasi abahale abaali abagwalaafu po beebisyanga baatyo ni bagondera abawamwawe. ⁶ Saala muha Yibbulayimu owaali mulala hu bahasi abo gebisyanga atyo, n'agonderanga wamwe era n'amulanga musengwawe. Munahola ebirani hya niye era ni mujuma hutya, muba bahaana babe.

⁷ Mu ngeri nj'enyene, abasinde mufaanie muuti abahasi benywe bibya binafu ohubahiraho. Mubanjenga enono ni mumayire muuti boosi balisuna ehirabo ehy'obulamu obutanwanjo olw'ehisa hya Hatonda. Munaholanga muutyo, olwo sinanabenganjo ehitigatigania ohusaba hwenywe.

Ohugada olw'ohuhola ebirani

⁸ Ehisembayo, mwisenga hirala, mwenda-nenga hy'abalebe era hiisi muutu anambirenga owahye ehisa, ni genomehire.

⁹ Omuutu nahuholanga ehibi, omany a otegalulanga olw'ehibi ehi ahuholire aye omusabirenga ekabi olwohuba ehyo nj'ehi Hatonda abendaho ko mwahasuna ekabi. ¹⁰ Hyanjandiihiwa hiiti;

“Owenda ohuba n'obulamu obulanji
 n'ohuwangaala,
 ali n'ohuhuuma olulimi lulwe
 ohutalimirira bahye n'ohuloma
 eby'obudulingi.

¹¹ Era alehere anjo ohuhola ebibi
 ahole ebirani,
 abe omuutu aleeta emiyaaya
 era geyongere mu jo.

12 Olwohuba Musengwa afaayo hu abo abahola ebiruṅamu, era aṅulira ohusaba hwawe. Aye sigenda abo abahola ebibi.”

13 Nj’ani oyo aja hubalomaho olw’ohufuba ohuhola ebiraṅi? Nṅuma. 14 Aye wayire babagudya, muli n’ekabi olwohuba muhola ebiraṅi. Olw’ehyo simutyanga ebi batya era mutenendehereranga.* 15 Aye Kurisito aṅire ehifo ehidaayi mu bulamu wenywe nga Musengwa. Mubenga butebute hiisi hiseera ohugobolamo omuutu yesiyesi ababuusa ebiṅamba hu ehyo ehi musuubira ohusuna. Aye hino muhiole n’ohwenenekeresa n’ohubaṅa eṅono 16 ni ṅuma hibi ehi muhweha mu myoyo jenywe ko abobaṅaha esiro baswaale ni babona esambo jenywe endani ng’abaloobera ba Kurisito. 17 Hiraṅi ohugada olw’ohuhola ebiraṅi ni huba husiima hwa Hatonda, ohuhira olw’ohuhola ebibi. 18 Hiri hiityo olwohuba Kurisito ataholangaho hibi hyosihyosi, era omwawufu gaafiiririra abatali bagwalaafu omulundi mulala gwoṅene, ohubaleeta eyiri Hatonda. Baamwita aye Hatonda gamulamusa hu lw’amaani g’Omwoyo* wuwe. 19 Yesu Kurisito gatiina e magombe mu komera gabuulira,† 20 abo abagaana ohudembuhira Hatonda olu gabehaliriha Nuwa n’abaaja eryato. Abaatu munaana

* **3:14** 3:14 Mat 5:10; Yis 8:12-13 * **3:18** 3:18 Ebyaṅandihiwa ebindi biroma biiti gafa mu mubiri aye bamulamusa mu mwoyo.
 † **3:19** 3:19 Ebyaṅandihiwa ebindi biroma biiti galomera emisambwa.

bonjeene nj'abanona amataba. ²¹ Era amataba ago gaalino ng'ahabonero ah'ohubatiziwa ohubanojola mwesi sosi hubogaho obudida hu mibiri jenywe aye ehisuubizo ehy'ohuba n'obulamu obulani mu moni ja Hatonda. Ohubatiziwa ohwo huhola olw'ohulamuha hwa Yesu Kurisito. ²² Yesu gatiina mwigulu era gehaaye hu lubega lw'omuhono omulungi ogwa Hatonda era anjuga abamalayika n'ebiitu byosibyosi.

4

Obulamu obunyaaha

¹ Ng'olu Kurisito gabonaabona hu musalabba, mwesi mube n'epeega eyi gaali ni nayo ey'ohucaawa ehibi olwohuba singa omutu yesiyesi bamugudya olwa Yesu, aba saahyenda huhola ebibi. ² Olw'ehyo mutabanga mu hwegomba hw'omubiri aye muhole ebi Hatonda genda.

³ Nga mwahena ebiseera ebyene ebingi ni muhola ebiitu ebi baatu abatamanyire Hatonda bahola! Mu bibi ebyo pomuli obuhwedi, obumeesi, ebinyumyo n'ohusenga emisambwa. Mwesi ebyo mbebi mubaayemo ebbanga eryo lyosiryosi. ⁴ Era nj'ahani abatatya Hatonda, hibeenjijisa ni babona ni mutahola ebibi ebi bahola, era c'ehigira babalomaho ebibi. ⁵ Aye balinosya mu moni j'oyo owetegehire ohusalira abalamu n'abafu emisango. ⁶ Era nj'ehigira ni baalomera ni abo abaafa* Amanjuliro Amalanji

* **4:6** 4:6 Abandi bajeega baati abafu abo nj'aba Yesu gabuulira olu gatiina e magombe n'afuuye.

bafugiirire wayire abaatu banjangire ohuba ni baabasalira omusango ni baali ni bahiiri hu hyalo huno aye njaahani basobola ohumenya ni Hatonda.

⁷ Bahyange, ekomerero yiri huupi hwola, olw'ehyo mube butebute era abegenderesa ko muḅange ohusaba ng'olu hisaana. ⁸ Aye ehihulu mu byosibyosi, mwendanenga n'omwoyo mulala olwohuba ohwenda huja hubaleetera ohu-soniḅanga abaatu ebibi ebi babahola.* ⁹ Era mu-sangaalirenga abafugiirira bahyenywe mu mago genywe ni muḅuma hwenjuluḅunya. ¹⁰ Hiisi muutu atambisenga ehirabo ehi ali ni nahyo ohuyeeda abandi mu hufugiirira hwawe era mube besigwa mu hutambisa ehirabo bya Hatonda mu ngeri yosiyosi. ¹¹ Oyo ali n'ehirabo eh'y'ohubuulira, alomere abaatu ehibono hya Hatonda n'amaani gosigosi. Ni nooyo ali n'ehirabo eh'y'ohuyeeda, ayeedenga olw'amaani ga Hatonda, ko abaatu baje Hatonda oyo ali n'amaani n'obuḅangi eḅono ohubita mu Yesu Kurisito emirembe n'emirembe. Amiina.

Ohubonaabona olw'ohufugiirira Yesu

¹² Bahyange abahoda, hitabeḅunjisa oti hani hinyaaha eyi muli ohubita mu hubonaabona ohubitiirifu. ¹³ Aye musaḅalyenga olwohuba mugada hya Kurisito olu bamugudya ko mwesi muḅange ohusangaala ehibitiriiye olu alihwehula eḅono lirye. ¹⁴ Muli n'ekabi banabahola ebisirisineye olwohuba baloobera ba Kurisito,

* **4:8** 4:8 Nge 10:12

ehyo hiraga hiiti Omwoyo ow'amaani owa Hatonda ali ŋalala ni nenywe. ¹⁵ Era hanye hubonaabona, mutabonaabonanga olwohuba abatemu oba abeebi oba olw'ehibi hyosihyosi oba abeyingisa mu songa ejitabaŋambaho. ¹⁶ Hitabaŋambyanga soni ohubonaabona olwohuba mufugiirira Kurisito aye mujumiryenga hujumirya Hatonda.

¹⁷ Nj'ehiseera ohusalira abaatu emisango ni batandiihira mu nyumba ya Hatonda, ne banatandihira hu fe, hinahabe hiitye eyiri abo abatafugiirira Amaŋuliro Amalaŋi aga Hatonda?

¹⁸ Era,
 "Obanga higosi omugwalaafu ohuŋunuha,
 ne baliba batye abo abatatya Hatonda
 n'abahola ebibi?"*

¹⁹ Olw'ehyo abo ababonaabona hu lw'ohugera hwa Hatonda waawe omwesigwa, baali n'ohwenerayo erala ohumwesiga era beegumye ohuhola ebiraŋi.

5

Abatangirisi n'abavubuka

¹ Eyiri abatangirisi babafugiirira Yesu, ese ng'omutangirisi wahyenywe, oneboneyeho Kurisito n'emoni jange n'abonaabona era ng'omulala hu balisuna omugabo mu buŋugi buwe hu ludaalo olw'ekomero,*

² mbahubbirisa mube baayi abalabirira bulani abaatu aba Hatonda gabaŋambya. Hino mutahiholanga olwohuba muli n'ohuhihola

* **4:18** 4:18 Nge 11:31 * **5:1** 5:1 Yow 21:15-17

aye mube baheneerefu mu bujeeresa wenywe ng'olu Hatonda genda mube, ni mutaluluhanira bbeesa aye ni mwenda ohujeeresa. ³ Ni mutali mugugu eyiri abaatu ba Hatonda aye ni muli hy'ohuboneraho mu sambo jenywe eyi bali. ⁴ Omwayi Omuhulu n'aligobola, musune engule ey'enono ey'emirembe n'emirembe.

⁵ Enywe abavubuka, mu ngeri nj'enyene munjulirenga ababahiraho obuhulu. Mwesimwesi mwenomehenga eyiri abahyenywe, olwohuba

“Hatonda sigenda abehudumbasa,

aye anambira abo abenomeha
ehisasabirisi.”*

⁶ Olw'ehyo, mwenomehenga mu moni ja Hatonda ali n'obunangi, aja hubadunda abate analani ehiseera ni hyolire.* ⁷ Munjambyenga Hatonda ebigosi byenywe byosibyosi, olwohuba afaayo.

⁸ Mubenga butebute olwohuba Sitaani, omusigu wenywe anjirita hy'empologoma etiina nana ni nanala ni yendula ehlohulya.

⁹ Mumunjiranienga ni mwemereeye mu hufugiirira n'amagulu gombi, olwohuba muhimanyire muuti n'abalebe benywe mu Kurisito abali mu byalo ebindi boosi babita mu hubonaabona. ¹⁰ Hatonda mu hisa hiye gabalanga ohusuna hu nono lirye ery'emirembe n'emirembe ni mubita mu Yesu Kurisito. Oluvanyuma lw'ohugada ahaseera, Yesu aja hubagobosa bunyaaha ahene abane amaani era

* 5:5 5:5 Nge 3:34 * 5:6 5:6 Mat 23:12; Luk 14:11; 18:14

abagumye mu hufugiirira hwenywe ni mubula husagasagana. ¹¹ Hatonda oyo anuge emirembe n'emirembe. Amiina.

Ohuseebula

¹² Mbanjandiihiye ebbaluŋa yino enyipinyipi ni neyeesa Siluvaano mulebe yange omwesigwa. Pandiihire ohubagobosamo amaani ti mu hubonaabona Hatonda abanjeramo ekabi, olw'ehyo mutanjwamo maani.

¹³ Abafugiirira bahyenywe ab'eno e Bbabbulooni,* aba Hatonda gatobola hyenywe, ni Mariko musaani yange, babaheehise.

¹⁴ Muheesanie mu keesa ey'abaatu abagwalaafu eraga ohwendana. Emiyaaya jibe ni nenywe mwesimwesi abafugiirira Kurisito.

* **5:13** 5:13 Huno hwali hububbirya ni bategeesa e Rooma.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff